

Tunup imartaani qilalugaq qaqortaq kisermaatsiarsuaq

Naak Tunup imartaa qaqortanik qilalugaqatigiiaaqarfiunngitsutut qangaaniilli ilisimaneqaraluartoq ilisimatusartartut Pinngortitaleriffimmeersut Tunumi aasap ingerlanerani misissuinerminni qilalukkamik qaqortamik ataasitsiarsuarmik naammattoorsipput. Pinngortitaleriffimmi ilisimatusartartoq Tunumilu qilalukkanik qernertanik kisitseqataasoq, Rikke Guldborg Hansen unnersiorpoq qilalukkanik qernertanik kisitsisoqarnerani qaqortaq toraarneqarsimasoq.

- Qilalugaq taanna qaqortaq ataaseq Tasiilap Kangerlussuullu akornanni qilalukkanik qernertanik aggustimi kisitsisunit takuneqarpoq. Tunu qaqortanik qilalugaqarfiunngitsuummat taavani qilalukkanik qaqortanik qaqtigorsuaannaq takusoqartarpoq. Akuttusoorujussuarnik takunnittoqartarsimavoq; ukiut 100-t kingulliit ingerlaneranni taamaallaat tallimat qulillu akornanniittut piniartunit, piniariartitaasunit ilisimatusaatigalugulu angalasunit takuneqartarsimallutik. Nalunaarutit tamakkua naapertoraanni paasinarpoq Tunu qangaaniilli qaqortanik qilalugaqarfiusimanngitsoq. Ukiunili kingulliinerusuni Tasiilami Ittoqqortoormiiniilu piniartut qilalukkanik qaqortanik takunnittalersimapput ukiullu marluk matuma siornagut Ittoqqortoormiini piniartut ilaat qaqortamik ataaseraarsimavoq. Taamaattumik imaassinnaavoq qilalukkat qaqortat Tunumukartartut amerliartortut, Rikke Guldborg Hansen oqarpoq nangillunilu:

- Tunumi qilalukkanik qaqortanik takunnittoqakulalissappat soorunami ilisimatinneqartarnissarput soqutigisupilussuarput, amerliartuinnaalissappatami pissanganassaqqimmat.

Tunumi qilalukkanik qaqortanik takunnittoqallattaaneruleraluartoq taamaattoq aningaasarpasuit atorlugit misissuissanut tunngavissat sulii amigarineqarput.



Tunumi qilalugaq qaqortatsiarsuaq sinersorusaartoq, qilalukkanik qernertanik aasakut 2016-imi kisitsinermi naammattoorneqarpoq. Assiliisoq: Rasmus Due Nielsen.

Svalbardtimeersuusinnaasut

Tunumi qilalukkanik qernertanik misissuinermi siuttuusup Professori Dr. Scient. Mads Peter Heide-Jørgensenip qilalukkat qaortat Tunumi takuneqartartut Nunatta kitaaneersuunatik Svalbardtimilli ikaartuusimanissaat ilimagaa.

- Svalbardtimiit tammartajaartuusimasinnaapput, Svalbardtimimi qilalukkat qaortat 1960-kkunni ilaatigut qaartartut dynamitsit atorlugit piniapiloorneqallaramik nungutaangajavissoraluarlutik eqqissisitaanermik kingorna ullumikkut ima amerlitigaat allaat ilaat ataasiakkaat Tunup sineriaanut immaqa tammartajaartalersimallutik. Sulili suminngaarneersooqqissaarnerat uppersivinninneqanngimmat pisaqartoqassaguni ilaminnguanik misissugassatsinnik nassinneqassagutta qujanassaqaq, Mads Peter Heide-Jørgensen naggasiivoq.